

古文孝經

全

					漢書門
一	二	三	八		
册	架	函	號	類	

庫文閣內					
三五函				漢	
	十一架	八一册		書	
				類	

內閣文庫		
番號	漢	80
冊數	1 (1)
函號	275	146

275-146



81

古文孝經序

孔安國

孝經者何也。孝者人之高行。經常也。自有天
 地人民以來。而孝道著矣。上有明王。則大化
 湧流。充塞六合。若其無也。則斯道滅息。當吾
 先君孔子之世。周失其柄。諸侯力爭。道德既
 隱。禮誼又廢。至乃臣弑其君。子弑其父。亂逆
 無紀。莫之能正。是以夫子每於閒居而歎述

孝經序

古之孝道也。夫子敷先王之教於魯，之洙泗門徒三千，而達者七十有二也。貫首弟子顏回、閔子騫、冉伯牛、仲弓，性也。至孝之自然，皆不待諭而寤者也。其餘則悻悻憤憤，若存若亡。唯曾參躬行匹夫之孝，而未達天子諸侯以下，揚名顯親之事。因侍坐而諮問焉。故夫子告其誼於世。曾子喟然知孝之爲大也。遂集而錄之，名曰孝經。與五經並行於世，逮乎

六國學校衰廢。及秦始皇焚書坑儒，孝經由是絕而不傳也。至漢興建元之初，河間王得而獻之。凡十八章文字多誤，博士頗以教授。後魯共王使人壞夫子講堂於壁中，石函得古文孝經二十二章，載在竹牒，其長尺有二寸，字科斗形。魯三老孔子惠抱詣京師獻之。天子使金馬門待詔學士與博士羣儒從隸字寫之，還子惠一通，以一通賜所幸侍

中霍光光甚好之言爲口實時王公貴人咸
神祕焉比於禁方天下競欲求學莫能得者
每使者至魯輒以人事請索或好事者募以
錢帛用相問遺魯吏有至帝都者無不齎持
以爲行路之資故古文孝經初出於孔氏而
今文十八章諸儒各任意巧說分爲數家之
說淺學者以當六經其大車載不勝反云孔
氏無古文孝經欲矇時人度其爲說誣亦甚

矣吾愍其如此發憤精思爲之訓傳悉載本
文萬有餘言朱以發經墨以起傳庶後學者
覩正誼之有在也今中秘書皆以魯三老所
獻古文爲正河間王所上雖多誤然以先出
之故諸國往往有之漢先帝發詔稱其辭者
皆言傳曰其實今文孝經也昔吾逮從伏生
論古文尚書誼時學士會云出叔孫氏之門
自道知孝經有師法其說移風易俗莫善於

樂謂為天子用樂省萬邦之風以知其盛衰
衰則移之以貞盛之教淫則移之以貞固之
風皆以樂聲知之知則移之故云移風易俗
莫善於樂也又師曠云吾驟歌南風多死聲
楚必無功即其類也且曰庶民之愚安能識
音而可以樂移之乎當時衆人僉以為善吾
嫌其說迂然無以難之後推尋其意殊不得
爾也子游為武城宰作絃歌以化民武城之

下邑而猶化之以樂故傳曰夫樂以關山川
之風以曜德於廣遠風德以廣之風物以聽
之脩詩以詠之脩禮以節之又曰用之邦國
焉用之鄉人焉此非唯天子用樂明矣夫雲
集而龍興虎嘯而風起物之相感有自然者
不可謂毋也胡笳吟動馬蹠而悲黃老之彈
嬰兒起舞庶民之愚愈於胡馬與嬰兒也何
為不可以樂化之經又云敬其父則子說敬

其君則臣說而說者以為各自敬其為君父之道。臣子乃說也。余謂不然。君雖不君，臣不可以不臣。父雖不父，子不可以不子。若君父不敬其為君父之道，則臣子便可以忿之邪。此說不通矣。吾為傳皆弗之從焉也。

序終

孝經

開宗明義章第一

仲尼間居。曾子侍坐。子曰：參，先王有至德要道，以順天下，民用和睦，上下無怨。汝知之乎？曾子避席曰：參不敏，何足以知之？子曰：夫孝，德之本也，教之所由生也。復坐。吾語汝。身體髮膚，受之父母，不敢毀傷，孝之始也。立身行道，揚名於後世，以顯父母，孝之終也。夫孝，始於事親，中於事

孝經

君終於立身。大雅云：無念爾祖，聿修厥德。扶夫音

去聲

聖人之德，無以加於孝。故曰：至德治天下，之道莫先於孝。故曰：要道。因民之性而順之，故曰：順天下。民用和睦，上下無怨。順之至也。上以善道順下，故下無怨。下以愛心順上，故上無怨。人之為德，必以孝為本。先王所以治天下，亦本於孝。而後教生焉。孝者，五常之本，百行之基也。未有孝而不仁者，也。未有孝而不義者，也。未有孝而不禮者，也。未有孝而不智者，也。未有孝而不信者，也。以事君則忠，以事兄則悌，以治民則愛，以撫幼則慈。德不本於孝，則非德也。教不生於孝，則非教也。君子之行，必修於本。記曰：身也者，親之枝也。敢不敬歟。身體髮膚，受之於親，而愛之。

則不敢忘其本，不敢忘其本，則不為不善，以辱其親。此所以為孝之始也。善不積，不足以立身。身不立，不足以行道。行修於己，而名從之矣。故以身為法於天下，而揚名於後世，以顯其親者，孝之終也。居則事親者，在家之孝也。出則事長者，在邦之孝也。立身揚名者，永世之孝也。盡此三道者，君子所以成德也。天子章第二

子曰：愛親者不敢惡於人，敬親者不敢慢於人，愛敬盡於事親，而德教加于百姓，刑于四海，蓋天子之孝也。甫刑云：一人有慶，兆民賴之。惡去聲

天子之孝，盡於事親，以及天下。愛親則無不愛也，故不敢惡於人。敬親則無不敬也，故不敢慢

於人。天子之於天下也。不敢有所惡。亦不敢有所慢。則事親之道。極其愛敬矣。刑之為言。法也。德教加于百姓。刑于四海者。皆以天子為法也。天子者。天下之表也。天子愛親。則四海之內。無不愛其親者矣。天子敬親。則四海之內。無不敬其親者矣。天子之孝。所以為法於四海也。詩曰。群黎百姓。徧為爾德。孝盡於心。而教被者。疾皇第。三於天下。孝盡於一身。而億兆無不法之也。言疾皇第。三

子曰。在上不驕。高而不危。制節謹度。滿而不溢。高而不危。所以長守貴也。滿而不溢。所以長守富也。富貴不離其身。然後能保其社稷。而和其民人。蓋諸侯之孝也。詩云。戰戰兢兢。如臨深淵。如履

薄冰離去聲

國君之位。可謂高矣。有千乘之國。可謂滿矣。在上位而不驕。故雖高而不危。制節而能約。謹度而不過。故雖滿而不溢。貴者易驕。驕則必危。富者易盈。盈則必覆。故聖人戒之。貴而不驕。則能保其貴矣。富而不奢。則能保其富矣。國君不可不守其位。惟勤於德。則富貴不離其身。故能保其社稷。和其民人。社稷所受於天子。先君者也。能保之。則為孝矣。夫位愈大者。守愈約。民愈眾者。治愈簡。中庸曰。君子篤恭而天下平。故天子以盡於事親為孝。諸侯以守位為孝。天子盡於事親。而天下莫不孝。諸侯守位。而後社稷可保。民人乃和。天子者。與天地參。德配天地。富貴不足以言也。

卿大夫章第四

子曰非先王之法服不敢服非先王之法言不敢道非先王之德行不敢行是故非法不言非道不行口無擇言身無擇行言滿天下無口過行滿天下無怨惡三者備矣然後能保其宗廟而享其爵位蓋卿大夫之孝也詩云夙夜匪懈以事

一人德行擇行行滿之

卿大夫以循法度為孝服先王之服道先王之言行先王之行然後可以為卿大夫不言非法也故口無可擇之言不行非道也故身無可擇之行欲言行無可擇者正心而已矣心正則無

不正之言不善之行言日出於口皆正也行日出於身皆善也雖滿天下而無口過怨惡則可謂孝矣易曰言行君子之所以動天地也然則言滿天下亦不必多行滿天下亦不必著一言一行皆足以塞乎天下其可不慎乎

士章第五

子曰資於事父以事母而愛同資於事君而敬同故母取其愛而君取其敬兼之者父也故以孝事君則忠以敬事長則順忠順不失以事其上然後能保其祿位而守其祭祀蓋士之孝也詩云夙興夜寐無忝爾所生長上聲

人莫不有本。父者生之本也。事母之道。取於事
父之愛心也。事君之道。取於事父之敬心也。其
在母也。愛同於父。非不敬母也。愛勝敬也。其在
君也。敬同於父。非不愛君也。敬勝愛也。愛與敬
交則兼之。是以致隆於父。一本故也。致一而後
能誠。知本而後能孝。故移孝以事君。則為忠。推
敬以事長。則為順。能保其
祿位。守其祭祀。土之孝也。

庶人章第六

子曰。用天之道。因地之利。謹身節用。以養父母。此庶

人之孝也。養去聲

用天之道。用其時也。因地之利。從其宜也。天有
時。地有宜。而財用於是乎滋殖。聖人教民。因之
以厚其生。謹身。則遠罪。節用。則不
乏。故能以養父母。庶人之孝也。孝乎章第七

子曰。故自天子以下。至於庶人。孝無終始。而患不及
者。未之有也。

庶人以養父母為孝。自士以上。則莫不有位。士
以守祭祀為孝。卿大夫以保宗廟為孝。諸侯以
保社稷為孝。至於愛敬之道。則自天子至於庶
人。一也。始於事親。終於立身者。孝之終始。自天
子至於庶人。孝不能終有始。而禍患不及者。
未之有也。天子不能刑四海。諸侯不能保社稷。
卿大夫不能保宗廟。士不能守祭祀。庶
人不能養父母。未有以不及其身者也。三才章第八

曾子曰。甚哉。孝之大也。子曰。夫孝。天之經也。地
之義也。民之行也。天地之經。而民是則之。則天

之明因地之義以順天下。是以其教不肅而成。其政不嚴而治。先王見教之可以化民也。是故先之以博愛而民莫遺其親。陳之以德義而民興行。先之以敬讓而民不爭。導之以禮樂而民和睦。示之以好惡而民知禁。詩云：赫赫師尹，民具爾瞻。

夫音扶。行治。好惡皆去聲。

易曰：大哉乾元，萬物資始，資始則父道也。又曰：至哉坤元，萬物資生，資生則母道也。天施之萬物莫不親於地，故孝者地之義也。天地之道順而

已矣。經者順之常也。義者順之宜也。不順則物不生。天地順萬物，故萬物順天地。民生於天地之間，為萬物之靈，故能則天地之經以為行。在天地則為順，在人則為孝。其本一也。則天地以為行者，民也。則天地以為道者，王也。故上則則天之明，下則因地之義，教不肅而成，政不嚴而治。皆因人心也。先之以博愛者，身先之也。博愛者無所不愛，况其親族，其可遺之乎。上之所為，不令而從之，故君能博愛，則民不遺其親矣。陳之以德義，德者得也，義者宜也。得於己，宜於人，必可見於天下。則民莫不興行矣。先之以敬讓，為上者不可不敬，為國者不可不讓。先之以敬讓，所以教民不爭也。禮者非玉帛之謂也，樂者非鐘鼓之謂也。禮所以修外，主於節，樂所以修內，主於和。天叙有典，天秩有禮，五典五禮，所以奉天也。有序則和，樂故樂由是生焉。有序而和。

未有不親睦者也。導之以禮樂，則民和睦矣。上之所好，不必賞而勸，上之所惡，不必罰而懲。好善而惡惡，則民知所禁，甚於刑賞。故人君為天下示其好惡，所在而已矣。詩云：赫赫師尹，民具爾瞻。言民之從於上也。

孝治章第九

子曰：昔者明王之以孝治天下也，不敢遺小國之臣，而況於公侯伯子男乎？故得萬國之歡心，以事其先王。治國者不敢侮於鰥寡，而況於士民乎？故得百姓之歡心，以事其先君。治家者不敢失於臣妾，而況於妻子乎？故得人之歡心，以

事其親。夫然，故生則親安之，祭則鬼享之。是以天下和平，災害不生，禍亂不作。故明王之以孝治天下也如此。詩云：有覺德行，四國順之。

夫音扶行

去聲

天子不敢遺小國之臣，則待公侯伯子男以禮可知矣。上以禮待下，下以禮事上，而愛敬生焉。愛敬所以得天下之歡心也。以萬國歡心而事先王，此天子孝之大者也。治國者不敢侮鰥寡，則無一夫不獲其所矣。以百姓歡心而事先君，此諸侯孝之大者也。伊尹曰：匹夫匹婦不獲自盡，民主罔與成厥功。天子之於天下，諸侯之於一國，有一夫不獲其所，一物不得其養，則於事

先王先君有不至者矣。治家者遇臣妾以道待
妻子以禮。然後可以得人之懽心。而不辱其親
矣。自天子至於卿大夫。事親以懽心。為大天子
必得天下之心。諸侯必得一國之心。卿大夫必
得一家之心。乃可以為孝矣。夫知幽莫如顯。知
死莫如生。能事親則能事神。故生則親安之。祭
則鬼享之。其理然也。災害天之所為也。禍亂人
之所為也。夫孝致之而塞乎天地。溥之而橫乎
四海。推一人之心。而至於陰陽和風雨時。故災
害不生。禮樂興。刑罰措。故禍亂不作。詩云。有覺
德行。四國順之。以天下之大。而
莫不順於一人。惟以能孝也。

聖法音義第十

曾子曰。敢問聖人之德。其無以加於孝乎。子曰。
天地之性。人為貴。人之行。莫大於孝。孝莫大於

嚴父。嚴父莫大於配天。則周公其人也。昔者周
公郊祀后稷以配天。宗祀文王於明堂以配上
帝。是以四海之內。各以其職來助祭。夫聖人之
德。又何以加於孝乎。故親生之膝下。以養父母。
日嚴。聖人因嚴以教敬。因親以教愛。聖人之教
不肅而成。其政不嚴而治。其所因者本也。

夫音扶行

養治並去聲

天地之生萬物。惟人為貴。人有天地之貌。懷五
常之性。故人之行。莫大於孝。聖人者。人倫之先

也。惟孝為大。嚴父孝之大者也。天子有配天之理。配天嚴父之大者也。自周公始行之。乃郊祀后稷以配天。宗祀文王以配上帝。四海之內皆來助祭也。所謂得萬國之懽心。事先王者也。聖人德至以如此。惟生於心也。孩提之童無不知愛其親者。故循其本而言之。親愛之心生於膝下。此其生知之良心也。既長矣。則知養父母而目加敬矣。此亦其自然之良心也。聖人非能強入以為善。順其性使明於善而已矣。愛敬之心人皆有之。故因其有嚴而教之敬。因其有親而教之愛。此所以教不肅而成政不嚴。而治其治同者。因於人之天性故也。父母生續章第十一

子曰。父子之道。天性也。君臣之義也。父母生之。續莫大焉。君親臨之。厚莫重焉。

父慈子孝者。順於天性。非人為之也。父尊子卑。則君臣之義立矣。故有父子。然後有君臣。中庸曰。父母其順矣乎。父之愛子。子之孝父。皆順其性而已矣。君臣之義。生於父子。人非父不生。非君不治。故有父斯有子。有君斯有臣。天地定位。而父子君臣立矣。父母生之。續其世。莫大焉。有君之尊。有親之親。以臨於已。恩義之厚。莫重焉。能知此。則愛敬隆矣。孝優為首。弟士

子曰。不愛其親而愛他人者。謂之悖德。不敬其親而敬他人者。謂之悖禮。以訓則逆。民無則焉。不在於善而皆在於凶德。雖得之。君子所不貴也。君子則不然。言斯可道。行斯可樂。德義可尊。

作事可法。容止可觀。進退可度。以臨其民。是以其民畏而愛之。則而象之。故能成其德教而行其政令。詩云：淑人君子，其儀不忒。行斯之行去聲樂音洛

君子愛親而後愛人。推愛親之心以及人也。夫是之謂順德。敬親而後敬人。推敬親之心以及入也。夫是之謂順禮。若夫有愛心而不知愛親。乃以愛人是心也。無自而生焉。有敬心而不知敬親。乃以敬人是心也。亦無自而生焉。無自而生者無本也。故謂之悖。自內而出者順也。自外而入者逆也。不施之親而施之他人。是不知己之所由生也。以之為訓則逆。不可以為法。故民無則焉。失其本心則日人於惡。故不在於善。皆在於凶德。雖得志於人上。君子所不貴也。君子存其心。修其身。為順而不悖。言斯可道。皆法言也。行斯可樂。皆善行也。德義可尊。作事可法。所以表儀於民。容止可觀。進退可度。德克於內。故禮發於外。美之至也。以此臨民。則民畏其敬而愛其仁。則其儀而象其行。故以德教先民。而無不成。以政令率民。而無不行。詩云：淑人君子。其儀不忒。言其德之見於外也。

紀孝行章第十三

子曰：孝子之事親也。居則致其敬。養則致其樂。病則致其憂。喪則致其哀。祭則致其嚴。五者備矣。然後能事親。事親者。居上不驕。為下不亂。在醜不爭。居上而驕。則亡。為下而亂。則刑。在醜而

爭則兵此二者不除雖日用三牲之養猶為不

孝也 樂音洛 養去聲

居則致其敬者舜夔夔齊慄文王朝于王季日
二是也養則致其樂者舜以天下養曾子養志
是也病則致其憂者武王養疾文王一飯亦一
飯文王再飯亦再飯是也喪與祭孝之終也備
此然後能事親居上不驕為下不亂在醜不爭
皆恐危其親也居上而驕則天子不能保四海
諸侯不能保社稷故亡為下而亂則人刑之道
也在醜而爭則與兵之道也孝莫大於寧親三
者不除災必及親雖能
備物以養猶為不孝也 五刑章第十四

子曰五刑之屬三千而罪莫大於不孝要君者

無上非聖人者無法非孝者無親此大亂之道

也 要平聲

人之善莫大於孝其惡莫大於不孝故聖人制
刑不孝之罪為大君者臣之所尊令也而要之
是無上聖人者法之所自出也而非之是無法
人莫不有親而以孝為非則是無其父母此三
者致天下大亂之道也聖人制刑以懲夫
不孝要君非聖之人所以防天下之亂也 廣要道章第十五

子曰教民親愛莫善於孝教民禮順莫善於弟
移風易俗莫善於樂安上治民莫善於禮禮者
敬而已矣故敬其父則子悅敬其兄則弟悅敬

其君則臣悅。敬一人而千萬人悅。所敬者寡而

悅者衆。此之謂要道也。於弟之弟去聲

孝於父則能和於親。弟於兄則能順於長。故欲民親愛禮順。莫如教以孝。弟樂者天下之和也。禮者天下之序也。和故能移風易俗。序故能安上治民。夫風俗非政令之所能變也。必至於有樂而後治道成焉。禮則無所不敬而已。天下至大。萬民至衆。聖人非能徧敬之也。敬其所可敬者。而天下莫不悅矣。故敬人之父。則凡為人子者無不悅矣。敬人之兄。則凡為人弟者無不悅矣。敬人之君。則凡為人臣者無不悅矣。敬一人而千萬人悅者。以此道也。聖人執要以御繁。敬寡而服衆。是以不勞而治道成也。
廣至德章第十六

子曰。君子之教以孝也。非家至而日見之也。教以孝。所以敬天下之為人父者也。教以弟。所以敬天下之為人兄者也。教以臣。所以敬天下之為人君者也。詩云。慎憚君子。民之父母。非至德其孰能順民如此其大者乎。弟夫聲

君子所以教天下。非人人而諭之也。推其誠心而已。故教民孝。則為父者無不敬之。教民弟。則為兄者無不敬之。教民臣。則為君者無不敬之。矣。君子所謂教者。孝而已。施於兄。則謂之弟。施於君。則謂之臣。皆出於天性。非由外也。詩云。愷悌君子。民之父母。愷以強教之。悌以悅安之。為

民父母。惟其職是教也。父母之於子，未有不愛而教之樂，而安之也。至德者善之極也。聖人無以加焉，故曰順民而不曰治民。孝者民之秉彝，先王使民率性而行，之順其天理而已矣。故不

洽白

應感章第十七

子曰：昔者明王事父孝，故事天明；事母孝，故事地察；長幼順，故上下洽。天地明察，神明彰矣。故雖天子，必有尊也，言有父也；必有先也，言有兄也。宗廟致敬，不忘親也；修身慎行，恐辱先也。宗廟致敬，鬼神著矣。孝弟之至，通於神明，光於四

海，無所不通。詩云：自西自東，自南自北，無思不

服

長上聲治行弟並去聲

王者事父孝，故能事天；事母孝，故能事地。事天以事父之敬，事地以事母之愛。明者誠之顯也，察者德之著也。明察事天地之道，盡矣。長幼順者，其家道正也。上下洽者，其君臣嚴也。事父母以格天地，正長幼，以嚴朝廷，上達乎天，下達乎地，誠之所至，則神明彰矣。天子者，天下之至尊也。承事天地，以教天下，則以有父也。貴老敬長，以率天下，則以有兄也。宗廟致敬，非祭祀而已也。修身慎行，恐辱及宗廟也。鬼神之為德，視之而不見，聽之而不聞，為之宗廟以存之，則可以著見矣。書曰：祖考來格。又曰：黍稷非馨，明德惟馨。孝至於此，則鬼神享其誠，而致其福。四海服

其德而順其行。格於上下。旁燭幽隱。天之所覆地之所載。日月所照。霜露所墜。無所不通。四方之人。豈有不思服者乎。

廣揚名章第十八

子曰。君子之事親孝。故忠可移於君。事兄弟。故

順可移於長。居家理。故治可移於官。是以行成

弟去聲。長上聲。治行並去聲。

於內。而名立於後世矣。

君者父道也。長者兄道也。國者家道也。以事父之心而事君。則忠矣。以事兄之心而事長。則順矣。以正家之禮而正國。則治矣。君子未有孝於親而不忠於君。悌於兄而不順於長。理於家而不治於官者也。故正國之道。在治其家。正家之道。在修其身。修身之道。在順其親。此孝所以為

德之本也

閨門章第十九

子曰。閨門之內。具禮矣乎。嚴父嚴兄。妻子臣妾

猶百姓徒役也。

閨門之內。具治天下之禮也。嚴父則尊君也。嚴兄則敬長也。乃國以民為本。家以妻子為本。非民無以為國。非妻與子無以為家。待妻子以禮。遇臣妾以義。則猶百姓不可不重。徒役不可不知其勞也。易曰。正家而天下定矣。孟子曰。天下之本在國。國之本在家。家之本在身。一家之治。猶天下之大。猶家也。善治者正身而已矣。

諫爭章第二十

曾子曰。若夫慈愛恭敬。安親揚名。參聞命矣。敢

問。子從父之令。可謂孝乎。子曰。是何言與。是何言與。昔者天子有爭臣七人。雖無道。不失其天。下。諸侯有爭臣五人。雖無道。不失其國。大夫有爭臣三人。雖無道。不失其家。士有爭友。則身不離於令名。父有爭子。則身不陷於不義。故當不義。則子不可以弗爭於父。臣不可以弗爭於君。故當不義。則爭之。從父之令。又焉得為孝乎。

扶與乎聲爭諍同皆去聲離去聲焉乎聲

父有過。子不可以不爭。爭所以為孝也。君有過。臣不可以不爭。爭所以為忠也。子不爭。則陷於不義。至於亡身。臣不爭。則陷君於無道。至於失國。故聖人深戒。曾子從父之令。是何言與。是何言與。古者天子設四輔。及三公。卿大夫士皆有諫職。至於瞽。獻曲。史。獻書。師。箴。瞽。賦。矇。誦。百工。獻藝。庶人。傳言。近臣。盡規。親戚。補察。耆老。教誨。所以救過。防失之道至矣。然而必有爭臣焉。爭者。諫之大者也。諫而不入。則犯顏引義。以爭之。不聽。則不止。故必有力爭者。至於七人。則雖無道。猶可以不失天下。諸侯必有五人。乃可以不失其國。大夫必有三人。乃可以不失其家。言爭臣之不可無也。忠臣之事聖君也。諫於無形。而止於未然。事賢君也。諫於已然。而防其未來。事亂君也。救其橫流。而極其將亡。故有以諫殺身者矣。益戒舜曰。罔遊于逸。罔淫于樂。禹戒舜

日。無若丹朱傲以上智之性而戒之如此惟舜
欲聞之此事聖君者也。傳說之訓高宗周公之
戒成王救其微失防其未來此事賢君者也。商
以三仁存亦以三仁亡此事亂君者也。人君惟
能儆戒於無形受諫於未然使忠臣不至於爭則何危亂之有事君章第二十一
子曰君子之事上也進思盡忠退思補過將順
其美匡救其惡故上下能相親也詩云心乎愛
矣遐不謂矣中心藏之何日忘之

入則父出則君父子天性君臣大倫以事父之心而事君則忠矣故孔子言孝必及於忠言事君必本於事父忠孝者其本一也未有舍孝而謂之忠違忠而謂之孝也進思盡忠退思補過

將順其美匡救其惡此四者事君之常道也昔
者禹益稷契之事舜也進則思所以規諫退則
思所以儆戒頌君之美而不為諂防君之惡如
丹朱傲虐而不為激是故君享其安富臣預其
尊榮此上下相親之至也若夫君有大過則諫
諫而不可去則去此豈所欲哉蓋不得已也詩云
心乎愛矣遐不謂矣中心藏之何日忘之夫君
子之愛君雖在遠猶不忘也而况於近可不盡
乎

喪親章第二十二

子曰孝子之喪親也哭不偯禮無容言不文服
美不安聞樂不樂食旨不甘此哀戚之情也三
日而食教民無以死傷生也毀不滅性此聖人

之政也。喪不過三年。示民有終也。為之棺槨。衣衾而舉之。陳其簋篚。而哀戚之。擗踊哭泣。哀以送之。卜其宅兆。而安措之。為之宗廟。而鬼享之。春秋祭祀。以時思之。生事愛敬。死事哀戚。生民之本盡矣。死生之義備矣。孝子之事親終矣。

於

豈反不樂之樂音洛

古者葬之中野。厚衣之。以薪。喪期無數。後世聖人為之中制。中則欲其可繼也。繼則欲其可久也。指之天下。而人共守焉。聖人未嘗有意於其間。此法之所以不廢也。是故苴衰之服。饘粥之

食。顏色之戚。哭泣之哀。皆出於人情。不安於彼而安於此。非聖人強之也。三日而食。三年而除。上取象於天。下取法於地。不以死傷生。毀不滅性。此因人情而為之節者也。死者人之大變也。為之棺槨者。為使人勿惡也。擗踊哭泣。為使人勿背也。措之宅兆。為使人勿褻也。春秋祭祀。為使人勿忘也。情文盡於此矣。所以常久而不廢也。夫有生者必有死。有始者必有終。生事之以禮。死葬之以禮。祭之以禮。則可謂孝矣。事死如事生。事亡如事存。孝之至也。

孝經終

去

七

蘇州蘇園書林

古賢齋文堂

瀨入田次書院

蘇州蘇園書林

出跋人

中林十原

蘇園總士裁

同 辛巳月出跋

明崇禎十六年七月六日出跋蘇園

福田

福

